

Un rat'i ora cu Tanta Dora



Conbai muchanan?

Luna pasá mi a conta boso cu despues di San Juan, nos ta spera awa di aña na luna di juli en adelante. Ta p'esey ta cuminsa bira tera, esta ta chapi pa tur insecto bin laira y solo mata nan. Tambe pa e tera keda suave, asina ora awa jobe e ta drenta e tera mas mihor. Nos grandinan ta papia di "hala hero".

Awo nos ta bai papia di maishi rabo. Ta hoyo cu un chapi di hoyo. E ta un otro chapi, e chapi cu nos conoce ta mas plat y su boca ta mas hancho. E distancia entre e hoyonan ta un stap grandi. Ta tira 4 pa 6 pipita di maishi rabo den e hoyo y ta dre'é suave cu pia pa e no pak, esey mas parti ta trabao di mucha. Ora tira pa casualidad hopi maishi rabo den e hoyo nos ta bisa "a sala e hoyo" y ora e maishi nace, ta ranca poco pasobra si tin hopi e ta strobe e maishi di crece.

Ora e maishi nace, y tin careda cu tin hoyo bashí, ta planta e careda ey y nos ta bisa "ta fura e plantacion".

Muchanan, boso sa cu ora awa jobe e kunukeronan ta duna otro pabien di awa sero? Y no ta falta e brinda, esta un bon bitter di rum of jenever pa kita e friu.

Laga nos sigui cu e maishi rabo. Ta pone muha 2 of 3 dia promé cu planta y e ta saca un raís chikito y esaki ta haci e maishi bira poco mas grandi. Nos ta bisa e ora ey "e maishi ta cu barica".

Despues e ta sigui crece y ta saca mas na laira un foyo so. E ora nos ta bisa "e maishi ta na bandera". Mas despues e ta saca tapushi y e ora ey mesetr bai cuid'é bon. E tin hopi enemigo, tur sorto di parha ta bin come, pero esun cu ta drispidí mas ta e prikichi, e ta come y benta abao. Tin cu pone un wantomba den cunucu. Nan ta jamé tambe spanta parha. Ta straño cu nunca mi a mira un wantomba bistí na un dama, semper ta na homber bistí.

Tambe ta pone molina trahá di bleki cu ta zona; ora biento ta supla e ta haci desordo. Bandera tambe ta pone; djies un pida paña blanco na un pida palo. Ora e maishi ta seco, ta bai tumba nan cu un machete skerpi, e kunukero ta corta e palo di maishi casi pareu cu e tera. E ta ten'é na boshi den su brasa y cu un solo sla e ta cort'é. Despues ta pone na bohí pa e seca.

Esta dushi ta pa hunga kaku scondí y sconde bao di un bohí, pero si e bohí mester cai abao sí wega a para y spera e resultado; pero nos sa si di saca nos som, ta neish'i galiña nos a bai busca y ora nos a

drenta pa coi e webonan e bohí a cai.

Ora e maishi ta bon seco na e bohí ta bai flech'é. Cu un sambechi skerpi ta kita e tapushinan pone den garetia pa hiba pone na parapeta. Parapeta ta wordo trahá di piedra abao, riba dje ta pone palo di maishi cu nos ta jama "cama pa e parapeta". E piedranan ta pa e cama no muha of bira friu cu jobida. Riba e cama ta stiwa e tapushinan pa nan sigui seca.

E palo di maishi ta wordo usa como cuminda di bestia. Tur kunukero tin cabrito, carné y antes burico. Ora e maishi keda pa un of dos siman riba e parapeta ta bai jen'é den saco pa hiba pa mangashina. Nos ta bisa e ora ey "ta drenta maishi", ta fiesta grandi, tur amigo y bisiña ta bin juda, ta cushina wea grandi di soppi carné y bati masha hopi pan di maishi rabo y no ta falta e bitter pa kita stof, ja cu e maishi tin hopi stof y bo ta grawata masha pisa. Kunukeronan ta masha social cu otro, un ta juda otro y nos ta jama esey "gana lomba".

Tin un dicho cu ta bisa: "Mañan nos ta corta maishi", kierenen nos ta cobra nos salario...

Awor muchanan mi ta bai. Mi ta bisa boso ayo cu hopi bendicion y pa boso pasa un Pasco dushi y un aña nobo cu hopi prosperidad.

Te otro luna cu poder di Dios...

Tanta Dora




luvidio



Chabalito

Number 3 - Año VI - Afl. 2,=



BIBLIOTECA NACIONAL ARUBA



3 0993 00185 648 3